

- ***Laus Gadium, Sandrae Ramos dedicata. Anna Elissa Radke concinnavit.***

Septimi , nolite timere, Horati,
barbaras Syrtes et adire Gades!
Namque ibi regnant, iuga qui latina
ferre libenter

gestiunt. Vobis loca quidnam amoena?
Ver quid aeternum tepidaeque brumae,
Tibur et flumen rapidum Galaesi
arte regente?

Ergo festinate et adite Gades:
Finis Europae tamen umbilicus
artium et cultus, ubi doctus ille
regnat Apollo.

- **Quintus Horatius Flaccus, *Carmina* 2.6.1:**

Septimi, Gadis aditure mecum et
Cantabrum indoctum iuga ferre nostra et
barbaras Syrtis, ubi Maura semper
aestuatur unda: 2.6.1

Tibur Argeo positum colono
sit meae sedes utinam senectae,
sit modus lasso maris et viarum
militiaeque. 5

unde si Parcae prohibent iniquae,
dulce pellitis ovibus Galaesi
flumen et regnata petam Laconi
rura Phalantho. 10

ille terrarum mihi praeter omnis
angulus ridet, ubi non Hymetto
mella decedunt viridique certat
baca Venafro, 15

ver ubi longum tepidasque praebet
Iuppiter brumas et amicus Aulon
fertili Baccho minimum Falernis
invidet uvis. 20

ille te mecum locus et beatae
postulant arces: ibi tu calentem
debita sparges lacrima favillam
vatis amici.